

Larab

Rebolusyunaryo nga Panmasa nga
Mantalaan han Sinirangan Bisayas

Septyembre 28, 2019 | Tuig 41 Ihap 9

8th ID, buwa an mga kadaugan – BHB

Ginpanhimuwa han Efren Martires Command an sering han 8th Infantry Division han Philippine Army kun diin ginpapasamwak nira an ira kuno kadaugan ha mas nagtikagrabe nga kampanya "kontra-insurhensiya" tikang hadton Agosto 1.

Sering ni Ka Karlos Manuel, tagapagyakan han EMC, kabaliskaran an pahayag han 8th ID tungod kay an ira tropa an nahia-gum han dako nga kaswalti, kun diin diri mamenos ha 17 an patay tikang Agosto tubtub Septyembre. Upat nga element han 20th IB ngan tig-lima nga sundalo tikang ha 46th IB ngan 63rd IB an napatay ha magkalain-lain nga taktikal nga opensiba han BHB samtang tulo nga ahente ha paniktik han militar an ira ginsirutan.

Ha pahayag han EMC hadton Domingo, gin-amkon han BHB an duha nga Pula nga mangaraway nga namartir ha Sulat, Eastern Samar, kundi ginklaro nga diri maabot ha 14 an nakumpiska nga armas nga sukwahi ha iginpapasamwak han 8th ID.

Ginkundenar liwat ni Manuel an pagbulos han kangalas han AFP ha masa kada naiibanan ini han pwera ngan napeperdi kontra ha BHB. Gin-eksplikar niya, may bentaha an BHB kontra ha tropa han militar tungod kay hitas an kahibaruhan han hukbo ha tereyn ngan makusog an suporta han masa. Ha sugad nga kamutangan, an mga sibilyan an tinuod



EDITORIAL

Palarabon an agraryo nga rebolusyon ha kabaryuhan ngan pakyason an pasista nga gerra

Maabot ha 75% han katawhan ha Eastern Visayas Region an mga parag-uma. Sanglit gindadara nira an bataan nga demokratiko nga demanda han mayoriya han katawhan: reporma ha tuna. Kundi, ura-ura an pagmenos han rehimen Duterte ha masa nga parag-uma. Hini nga tuig, nanhatag ini han mga papeles nga ginpapagawas nga reporma kuno ha tuna, kundi an tinuod nag-oobligar la ha mga parag-uma nga magbayad tubtub maamkon nira an tuna. Waray ini hingaradtuan – ha kasaysayan, masobra 90% han mga parag-uma an diri nakakabayad para ha tuna ngan ginhihikawan la gihapon hini ha katapus-tapusan. Lugod, padayon ngan mas dagmit yana nga gin-aamkon an tuna han dagko nga agaron maytuna, labina

para ha mga minahan, plantasyon ngan iba pa nga proyekto han mga langyawanon ngan ira kakunsabo.

Diri makakabayad para ha tuna an mga parag-uma kay diri ngani hira natalwas ha kakurian ngan kakablasan. Gintaanos nira an kontra-katawhan, maka-imperyalista ngan pasista nga mga palisiya ilarum han rehimen Duterte. Laprak an presyo han lubi nga prinsipal nga produkto han rehiyon tungod ha pagbaha ha merkado han *palm oil*, labot pa ha maiha nga pankalibutan nga krisis han kapitalismo. Ginpatatay liwat an mga parag-uma han humay tungod han pagbaha han barato nga bugas tikang ha langyaw durot han liberalisasyon ha pag-import han bugas. Humitaas liwat an mga garastuson

"Palarabon...", tikang ha paypay 1

ha produksyon han mga parag-uma tungod han dugang nga buhis pinaagi han balaud nga TRAIN.

Susrunod liwat an mga kalamidad nga nahiaguman han mga parag-uma kundi pagpasibaya an baton han reaksyunaryo nga gubyrno. Maiha na hira nga apektado ha destroso ha agrikultura han bagyo Yolanda ngan sumunod pa nga bagyo. Susrunod liwat an mga peste ha lubi ngan humay. Hini nga tuig, umigo an kathuraw durot han El Niño nga penomenon.

Atubangan han pagkukuri han masa nga parag-uma, kamadarahug ngan pagtamay an baton han rehimen Duterte agud pugngan nga mag-alsa hira. Gin-gagamit han pasista nga rehimen an daup nga pagiuson kuno an "bug-os nga nasud" kontra ha rebolusyunaryo nga kagiusan. Karuyag sidngon, gimimilitarisa an katilingban ngan an bug-os nga gubyrno. Naghahadi an militar ha kabaryuhan hin waray baratunon ha ira panmatay, pagtortur, pagharas, pagbutang ha mga sibilyan ha kadelikaduhan ngan iba pa nga panalapas ha tawhanon nga katungod ngan internasyunal nga makatawo nga balaud. Ginpipirit an mga lokal nga gubyrno ngan an mga parag-uma nga igdiri an rebolusyunaryo nga kagiusan. Ginlalansar han militar an buwa nga pagpasurender ha mga parag-uma nga mga inosente nga sibilyan kundi ginpapagawas nga mga kaapi han Bagong Hukbong Bayan. Ginbubursa naman han mga hitaas nga upisyal nga sibilyan ngan militar an pondo nga E-CLIP para ha mga "sumurender." Gindadako liwat an mga proyekto ha panginabuhì, mga imprastruktura, ngan iba pa nga pasundayag nga ginbalayan ha "kontra-insurhensiya" ngan waray signipikante nga bulig ha mga parag-uma.

Kun sugad, importante kaupay nga mapagios an mga parag-uma komo nangunguna nga pwersa ha rebolusyon. An pasista nga opensiba han rehimen Duterte gintutumuyo nga ihimulag an mga parag-uma ngan katawhan ha rebolusyunaryo nga kagiusan. Kundi an rehimen Duterte amo mismo an nahihimulag tungod han pasista nga terorismo hini. Labaw pa hini, kinahanglan gud nga ipakita nga aada ha rebolusyonaryo nga kagiusan an tinuod nga paglaum

para ha tuna ngan kauswagan han masa nga parag-uma.

An makusog nga kagiusan parag-uma amo an waray putas nga burabod para ha gerra han katawhan ngan ha pagtutukod han demokratiko nga gubyrno han katawhan ha kabaryuhan. Masisiguro an pagpagios ha mga parag-uma pinaagi han agraryo nga rebolusyon, kun diin hiluagan nga ginpapatuman an minimum nga programa, samtang an maksimum nga programa han kumpiskasyon ginpapatuman ha mga lugar kun diin akos na ini himuon.

Kinahanglan seryoso nga adman an kongkreto nga kahimtang han masa nga



parag-uma. Hahatagan han pinakabug-at nga pagtagad an matiyupion nga pyudal nga relasyon ha produksyon. Kalakip dinhi an pagpamenos han plete han tuna, pagpaubos han interes han usura, pagpahitaas han suhol han mga trabahador ha uma, pagpahimubo han plete han karabaw ngan iba pa nga higamit ha produksyon, kontra ha panlupot han tuna han agaron maytuna ngan reaksyunaryo nga gubyrno, katungod ha pag-uma ha lote han asyenda, ngan pangayad han sistema ha panguma ha mga kumpiskado, abandonado ngan gindonar nga mga tuna.

Komo sekundaryo kundi esensyal, kinahanglan pakigbisugan an bagapyudal nga paniniyupi kasumpay han pagbaligyaay. Kalakip dinhi an pagpamenos han tarha ha kopras, pagpara han limbong ha taraksan ngan timbangan, pagpahimubo han presyo han pankonsumo nga epektos, pagpahitaas han presyo han produkto ha uma, pagpahimubo han presyo han abono ngan pestisidyo, ngan iba pa.

Dugang pa nga kinahanglan ikampanya an pagpahitaas han produksyon sugad han panin anum para ha direkta nga konsumo, pagpauswag han produktibidad han trabaho, pagpakusog han kooperasyon ha produksyon, pag-aram han mas abante nga pamaagi han pag-uma, ngan iba pa. Poyde liwat sukton an reaksyunaryo nga gubyrno para ha pagpasibaya hini ha iya mga obligasyon ha mga parag-uma sugad han hinabang para ha panahon han kalamidad.

Ini nga mga kampanya ha kabaryuhan amo an makakapadig-on ha determinasyon han mga parag-uma atubangan han pasista nga opensiba han rehimen Duterte. Hugot nga magkasumpay an ira pampulitika ngan pan-ekonomiya nga pakigbisog. Diri akos han pasista nga kaaway nga mapokus an ngatanan nga erya. Sanglit, samtang naato ha militarisasyon an ginlalasurbo han pasista nga opensiba han kaaway, nakikigbisog naman para ha pan-ekonomiya nga interes an mga parag-uma nga diri pa militarizado an lugar. Ginbubutok hira pareko ha komun nga pakigbisog agud atuhan an pasista, kurap ngan niyutiyo nga rehimen Duterte. Ha sugad, hiluagan nga napapakusog ngan napapasulong an kagiusan parag-uma.

Makakapalutaw han damo nga mga lider ngan aktibista tikang ha damo ngan magkalain-lain nga pamaagi han pakigbisog han parag-uma. Makakapakusog hira han ira mga organisasyon masa ha baryo, bungto ngan interbungto. Ha dirudiretso nga pag-uswag, ha dayuday matutukod an mga organo han poder pampulitika komo mga liso han demokratiko nga gubyrno han katawhan. Tutukuron liwat an mga yunit han milisya han katawhan ngan mga yunit ha pagdependa han kalugaringon agud mapanalipdan an seguridad han katawhan. An mga parag-uma nga andam na o ginbibiling na han pasista nga kaaway poyde nga umapi ha BHB agud magpartisipar ha gerra han katawhan. Ha sugad, napapakusog han agraryo nga rebolusyon ngan kagiusan han parag-uma an militante ngan armado nga pakigbisog agud atuhan ngan paiwason an ginkakangalsan nga rehimen Duterte. █

BALITA

Konsehal han bungto ngan asawa nga kapitan, ginpatay

Ginpatay han mga kaapi han CAFGU hi Claudio Gabiana, usa nga konsehal han Jiabong, Samar ngan asawa hini nga hi Assuncion, kapitan han Brgy. Jose Roño, Paranas, hadton Septyembre 15 dapit alas-7 han aga. Nag-aabre pa la han ira tindahan ha ira balay ha Brgy. Jose Roño hi Claudio hin pusilon hiya han tulo nga kalalakin-an. Ginsagka pa nira an balay han mag-asawa ngan ginpusil liwat hi Assuncion. Samtang tipatay na, gin-ngaranan ni Assuncion nga mga kaapi han CAFGU an pumusil ha ira, sukwahi ha una nga sumat han lokal nga kapulisan nga mga kaapi han BHB an responsable ha krimen. Kahuman han pagpatay, dumiretso an mga salaan ha mga elemento han 87th IB nga nakada ha *covered court* han barangay sapit han balay han mga Gabiana. Waray hira ginlabtan han mga sundalo. Hadto pa gindududahan han militar nga tag-suporta han BHB an mag-asawa. An mag-asawa amo an ikapito ngan ikawalo nga lokal nga upisyal nga ginpatay han gintutuohan nga militar hini nga tuig ha rehiyon.

Ginkundenar han NDF-Eastern Visa-

yas an madarahug nga pagpatay ha mag-asawa nga Gabiana.

Masobra 93 nga pamilya, nag-ebakwet ha Northern Samar.

Nag-ebakwet an diri mamenos ha 93 nga pamilya ha Brgy. Roxas, Lope de Vega. Northern Samar, kahuman pwersado nga ginsulod han mga sundalo han 43rd Infantry Battalion an ira baryo hadton Septyembre 20. Ha yana, ada ha bungto han Lope de Vega an mga residente.

Basar ha sumat han Katungod-Sinirangan Bisayas, magkalain-lain nga porma han panalapas an ginhimo han 43rd IB kalakip an harasment ngan intimidasyon, pwersahay nga pagsulod ha panimalay han mga sibilyan, ngan ilegal nga panrekisa.

Mahihinumduman nga nag-ebakwet liwat an mga residente han Brgy. Roxas hadton naglabay nga tuig tungod kay nagtikagrabe an militarisasyon. Ha yana, nahahadlok an mga residente tungod kay ada ha Brgy. Curry nga apike nga barangay ha Roxas an detatsment han 43rd IB. ■

"8th ID, buwa...", tikang ha paypay 1

nga apektado han pasista nga opensiba han 8th ID, diri an BHB.

Kongkreto nga ladawan hini an duha nga barangay kapitan nga hira Wilmar Calutan han Brgy. Beri, Calbiga ngan Apolinario "Pening" Lebico han San Miguel, Las Navas nga ginpatay han 8th ID kahuman maperdi ha engkwentro kontra ha BHB. Samtang, duha nga residente han Brgy. Cogon, Basey an napiritan mag-ebakwet kahuman paura-an han bala han militar, dara pa liwat han ira pagkaperdi ha BHB.

Dugang pa ni Manuel, padayon la gihapon an militarisasyon ilarum han kontra-insurhensiya nga programa ni Duterte kun diin diri mamenos ha 545 nga barangay ngan maabot 300, 000 nga molupyo na an apektado nga dugang ha nagpabilin nga problema ha kawarayatuna, trabaho, padayon nga pagluros han presyo han mga agrikultural nga produkto samtang nahitaas an presyo han mga batakan nga produkto, ngan iba pa nga isyu.

Ginsiguro ni Manuel nga magpapadayon an BHB nga mabulig ha masa ha paglalansar han armado nga pakig-away tubtub mapatalsik an rehimen Duterte. ■

Pasismo ilarum han rehimen Duterte, natikapintas

Ginsuma han Partido Komunista ng Pilipinas an natikapintas nga pasismo ilarum han rehimen Duterte ha ginpagawas hini nga praymer hadton Septyembre 21. Poyde na i-download an Winaray nga bersyon hini ha website nga <https://evsirang.blogspot.com>.

Ha "Pasismo ilarum han rehimen Duterte," ginladawan han PKP an rehimen Duterte komo usa nga "pasista nga estado nga may manipis nga tahap." An kunohay demokratiko nga gubyrno hini ha kamatuoran nagpailarum ha nasud ha usa nga diri-deklarado nga balaud militar gamit an iya ahente nga militar ngan pulisya.

Ginraday han PKP an mga instrumento han pasismo ni Duterte. Komo usa nga demagogo, nagbibinuwa hiya nga abuyon hiya ha panawagan han katawhan para ha disente nga panginabuhin ngan pagtapos ha kurapsyon, bisan kun

hiya an nagpatok han mga pakuri nga palisiya ngan kaalyado la gihapon niya an mga Arroyo ngan Marcos. Gin-gagamit niya an taktika han diktador sugad han panmatay ngan pangabuso ha katungod han katawhan agud ipakita an poyde niya himuon samtang aada ha poder ngan pasundon an ngatanan ha iya karuyagon. Ginpupuyoy niya an mga ligal nga demokratiko nga organisasyon pinaagi han malisyoso nga pagsumpay hini ha rebolusyunaryo nga kagiusan, samtang ginpapasamwak an mga "pro-Duterte" nga grupo nga hiya gihapon an

"Pasismo...", sundan ha paypay 4



Pagtipa tikang ha han-ay han militar

An mahugaw nga kultura ngan kawaray-prinsipyo ha sakob han militar han reaksyunaryo nga gubyrno amo an nadurot han demoralisasyon ngan pagtipa tikang ha ira ranggo. Sigon ini ha masunod nga ginpahalipot nga artikulo han Liberation, an upisyal nga mantalaan han National Democratic Front of the Philippines, nga ginpagawas hini nga Septyembre.

An sistema nga padrino nga unob na ha Armed Forces of the Philippines ngan Philippine National Police nagtikang pa ha mga kolonyalista nga Espanyol. Kundi ini an gindid-an ni Brig. General Raymundo Jarque, an retirado nga upisyal nga may pinakahitaas nga ranggo nga bumalhin ngadto ha BHB, kahuman niya masaksihan an pag-akomodar han hadto anay presidente nga hi Fidel Ramos ha iya mga alyado ngan an kurapsyon ha militar.

Hilarum nga nakagamot an kurapsyon ha militar: ha pagpalit hini han mga higamit, ha pagbayad ha ira han mga lokal ngan langyaw nga korporasyon, ha ismagling, ha mga ilegal nga droga, ngan pamaligya han armas ngan higamit militar ha mga rebelde nga grupo.

Sanglit hin-o man nga sundalo ha ubos nga balitang an maglarang nga ibuksas ini poyde mabutang ha peligro o patayon. Sugad an nahitabo kanda Ensign Philip Pestaño han Philippine Navy, ngan kan Lt. Jessica Chavez han 191st Military Police Battalion, kun diin gindiwara la komo pag-unay an ira pagkamatay kahuman nira madiskubre an pag-ismagol han droga ngan mga armas ha ira mga yunit.

Hadton 2003, ini nga kurapsyon ngan mahugaw nga kultura an nagduso ha 300 nga sundalo han Army, Navy ngan Air

Force nga magkudeta kontra ha pasista nga rehimen ni Gloria Macapagal-Arroyo ngan idemanda an iya pagbul-iw ha poder. Kundi waray ini magdaug tungod ha kakulang han suporta han masa.

Waray wantas an butaray nga kurapsyon han higtaas nga upisyal han militar. Usa ha damo nga kaso hini an pag-alutaga han P50 milyon tikang ha pondo publiko para ha mga magreteriro nga heneral. An pinakagrabe nga kaso amo an pagkawat han pondo nga gintirok tikang ha 5% han suhol han kada sundalo nga gin-iiban kada bulan. Ginbursa la han mga upisyal han AFP ini nga pambayad unta para ha pensyon ngan benepisyong mga ordinaryo nga tawuhan.

Hadton Enero 2015, 44 nga kaapi han PNP-Special Action Force an namasaker ha insidente han Mamasapano, ha Maguindanao. Ini nga operasyon ginpamunuan han gubyrno han Pilipinas ngan kabulig an US Army agud targeton an Malaysian nga taghimo han bomba nga hi Marwan o Zulkifli Abhir. Nakarag la an ira kinabuhi para ha interes han mga langyaw ngan lokal nga naghahadi nga klase.

Ini nga panhitabo nagseserbe nga panawagan ha mga tawuhan han militar han naghahadi nga klase nga magmata na. ■

"Pasismo..." tikang ha paypay 3

nagpondo. Pinaagi han deklarado ngan diri-deklarado nga balaud militar, ginduduso niya an pulis ngan militar nga magbuhat han wala-tuo nga panalapas ha tawhanon nga katungod, sugad han pagpatay, tortyur, ilegal nga pangaresto, pagsikmit ngan pangatake ha mga komunidad. Ha katapusan, gamit an iya linya nga kontrakomunismo ngan kontra-insurhensiya, gintagan niya rason an pagmilitarisa ha sibilyan nga gubyrno ngan ipailarum an nasud ha usa nga baga sibil-militar nga hunta.

Sigon ha PKP, lumutaw an pasismo ni Duterte durot han natikagrabe nga krisis han bagakolonyal ngan bagapyudal nga katilingban Pilipino. Katuyuanan hini nga "isalbar an naghahadi nga sistema atubangan han depresyon han pankalibutan nga krisis han kapitalista nga sistema."

Nanawagan an PKP ha ngatanan nga demokratiko ng pwersa nga "magkaurusa komo usa nga hiluag nga kontrapasista nga han-ay kontra ha rehimen Duterte," kalakip an ngatanan nga gintitiyupi ngan gintatalumpigos, mga tawo-ha-singbahan, taga-midya, akademiko, ngan bisan an pulitikal nga oposisyon nga kontra-Duterte. Nanawagan liwat an PKP ha mga kadre ngan kaapi hini ngan ha BHB nga magpadigon han kalugaringon agud magserbe nga "taliba ngan rubas" kontra ha pasista nga rehimen Duterte. ■

Provincial Task Force kontra ha "insurhensiya," mga sibil-militar nga hunta

Nagpahimitangon an Efren Martires Command han Bagong Hukbong Bayan-Eastern Visayas (BHB-Eastern Visayas o EMC) nga an mga gintukod nga Provincial Task Force to End Local Communist Armed Conflict (PTF-ELCAC) ha kada prubinsya ha rehiyon ha esensya mga "sibil-militar nga hunta" nga magpapailarum han sibilyan nga gubyrno ngan han katawhan ha poder han militar.

Sigon kan Ka Karlos Manuel, tagapagyakan han EMC, ginhahatagan gahum han PTF-ELCAC an Armed Forces of the Philippines (AFP) nga pamunuan an gubyrno ngan katilingban para ha "kontra-insurhensiya" ha ngaran han pagpagios han "bug-os nga nasud."

Agud ini pagawson han AFP nga ginsusuportahan han katawhan an programa "kontra-insurhensiya" ni Duterte. Sigon kan Manuel, "Pamumunuan han PTF-ELCAC an mga deklarasyon nga 'persona non grata,' piniritay nga pagpasurrender, kontra-komunista nga katitirok ngan 'peace rally' ha mga barangay, eskoylahan ngan iba pa nga institusyon."

Gindugang niya nga dara han PTF-ELCAC an baga-baga balaud militar ngan magreresulta ini ha mas damo nga panalapas ha tawhanon nga katungod diri la ha 31 nga 'gintudlok nga prayoridad nga barangay' kundi ha bug-os nga Eastern Visayas."

Nanawagan hi Manuel ha katawhan nga ibuksas ngan atuhan an EO 70 ngan iba pa nga pasista nga iskema ha rehimen Duterte. Nanawagan liwat hiya ha mga lokal nga upisyal nga atuhan an militarisasyon han ira mga upisina ngan depensahan an ira mga molupyo tikang ha mga atake han militar ngan pulis. ■

NDF-EV, ginkundenar an pag-atake ha edukasyon ngan iba pa nga katungod han kabatan-unan

Gintawag han National Democratic Front-Eastern Visayas nga “buwa” an gindadako han rehimen Duterte nga programa ha “libre nga edukasyon” kahuman gin-amkon han rehiyunal nga upisina han Commission on Higher Education (CHED) nga “pribilehiyo” an edukasyon ngan diri unob nga katungod han mga kabatan-unan.

Ha iya pahayag hadton Biyernes, nagsering hi Fr. Santiago “Ka Sanny” Salas nga gin-pamatud-an han CHED-Regional Office 8 an pagigin buwa hini nga programa han magsering ini nga pira nga estudyante la an naangay nga hatagan han subsidyo ha edukasyon han gubyrno.

Dehado la gihapon an mga esudyante ha “libre nga edukasyon” ni Duterte nga ginpatuman an iskema han *socialized tuition*, kun diin hira an ginpabayad para ha igkasi nira estudyante samtang nalikay an gubyrno ha responsabilidad hini.

Dugang pa nga pan-gigipit ha kabatan-unan an mga kontra-demokratiko nga palisiya nga gin-iimponer ni Duterte, sugad han milita-

risasyon ha mga eskoylahan, tarhug ha kalibrihan ha pamamahayag, pagbalik han *mandatory* ROTC, ngan pagpamenos han minimum nga edad para ikunsidera nga kriminal.

Gin-ayat ni Fr. Salas an kabatan-unan tikang ha dirudilain nga eskoylahan, organisasyon ngan komunidad, nga ipadayon an ira militansya ngan pakyason an tiraniya ni Duterte Sigon ha iya, kinahanglan

liwat nira umapi ha hiluag nga oposisyon agud padagmiton an pagpapatalsik ha rehimen Duterte, ngan makigbisog upod an batakan nga masa ngan iba pa nga demokratiko nga klase ngan sektor.

Sigon pa kan Fr. Salas, ginkakarawat han Bagong Hukbong

Bayan an kabatan-unan nga gintarget han pasista nga rehimen US-Duterte nga ada na ha tama nga edad ngan andam nga magerbe ha hukbo han katawhan ngan ha demokratiko nga gubyrno han katawhan. ■



Alyansa kontra ha hiluagan nga importasyon han bugas, ginlansar

Gintukod hini nga Lunes an Bantay Bigas-Eastern Visayas, usa nga hiluag nga alyansa nga nananawagan han pagbasura ha balaud para ha dugang nga importasyon han bugas ngan para ha pagpakusog han industriya han bugas ha Pilipinas.

Sigon kan Jun Berino, prinsipal nga convenor han Bantay Bigas-EV, durot han Rice Tariffication Law, papatayon han dugang nga liberalisasyon han importasyon han bugas an pakabuhian han mga lokal prodyuser han bugas. Tungod ini kay diri nira akos makigkumpitensya ha mas barato nga *imported* nga bugas nga naprodyus gamit an mas abante nga higamit ngan mas guti nga puhunan. Hini nga bulan, lumuros an presyo han humay ngadto ha P12 kada kilo tikang P18-20 kada kilo.

Nananawagan liwat an alyansa han kadagmitan nga ayuda para ha mga parag-uma nga nalugi tungod ha grabe nga El Nino nga nandestroso ha mga humayan ha rehiyon tikang pa han katapusan han 2018. Kulang o waray gud bulig nga ginpanhatag an mga lokal nga gubyrno ha mga naapektuhan nga parag-uma.

Sigon ha grupo, delikado an Rice Tariffication Law ha seguridad ha pagkaon ha rehiyon. Magresulta liwat ini ha pagpapaserra han National Food Authority ngan hiluagan nga pagtanggap han mga empleyado hini.

Nagsaad an grupo nga aktibo hira nga mananawagan para ibasura an nasering nga balaud. ■

Maanomaliya nga badyet ni Duterte, ginsukna

Nagpahimatngon an Bagong Alyansang Makabayan (BAYAN)-Eastern Visayas nga papas-anon han katawhan Pilipino an maanomaliya ngan vulnerable ha kurapsyon nga ginproposisyon nga badyet han gubyrno Duterte para ha 2020.

Ha pahayag hini hadton Septyembre 23, ginkwestyon han grupo an pagpadagmit ha kongreso han P4.1 trilyon nga nasyunal nga badyet kahuman han mando ni Duterte.

Ginpahitaas an badyet para ha Department of National Defense at Philippine National Police ngadto ha P189 bilyon ngan P185 bilyon. Samtang, ha luyo han kulang ngan mga natikadunot nga hospital ngan eskoylahan, iibanan ngadto ha P159 bilyon tikang P169 bilyon an alokasyon para ha Department of Health ngan hahatagan la han P551 bilyon an Department of Education bisan kun P880 bilyon an gin-aaro hini nga pondo.


Babaydan naman han sumobra-kumulang P35 bilyon, o tag-P100 milyon, an kada kongresista han pondo nga *discretionary* o nakadepende ha kongresista kun para diin ini gagastuson. Sigon ha BAYAN-EV, pinaagi han kurap nga sistema nga padrino, nasiguro ni Duterte nga sunud-sunuran an kongreso ha iya mga karuyagon. Natipa liwat ini ha nauna nga desisyon han Korte Suprema nga talapas ha konstitusyon an sistema nga *pork barrel*.

Nanawagan an BAYAN-EV ha katawhan nga ibuksas an mga anomaliya ha ginproposisyon nga badyet, ngan ipanawagan an pagbalhin han pondo tikang ha pulis ngan militar ngadto ha mga serbisyo publiko. ■

Larab

Rebolusyunaryo nga Panmasa nga Mantalaan han Sinirangan Bisayas

Septyembre 28, 2019 | Tuig 41 Ihap 9

 [ndf.easternvisayas](https://www.facebook.com/ndf.easternvisayas)

 [@ndfevisayas](https://twitter.com/ndfevisayas)

 ndfevis@gmail.com

 evsirang.blogspot.com